



*Dhaabbaawwan  
(Gardens) Arfanii fi  
dhoksaawwan isaanii!*

Dhaabbaa Eden, Dhaabbaa Geetsemaanee,  
Dhaabbaa Golgootaa fi Dhaabbaa  
Waaqayyoo (paradise) jedhamu.  
Dhaabbaawwan kunneen bakka (position)  
karaa kiristoos amantootni qaban  
agarsiisu. Karoora fayyisuu Waaqayyoo

keessatti dadhabbii namaa fi gahee

Waaqayyoo agarsiisu.

Amantiin Kiristiyaanaa Adeemsa. Eden

dhaabbaa Kufaatii fi Cubbuu irraa gara

Getsemaanee dhaabbaa dhiphinaatti

,achiis gara Golgootaa dhaabbaa

Moo'ichaatti. Golgootaa irraa ammoo Gara

dhaabbaa Jannataa kan jireenya

barabaraatti humna fayyisuu Waaqayyoon  
adeemneerra.



Tokkoon tokkoon  
dhaabbaawwan  
kanaa Keessatti  
Kiristoos nu wajjin

argamuun bakka keenya bu'ee hamma  
dhaabbaa ofii isaa biraan nu gahutti  
dadhabbii guddaan fiixaan baaseera.



## *1. Eden-Dhaabbaa*

### *cubbuuti.*

Cubbuun dura hariiroon

namaaf Waaqayyo

gidduu guyya guyyaan kan addaan hin

cinne ture.Cubbuun booda garuu

dhaabbichi iddoo cubbamoonna

Waaqayyoon dhokatan tahe.

" Kana booddee namichii fi haati manaa  
isaa yeroo qilleensi qabbanaa'aan  
qilleensa'utti Waaqayyo gooftaan iddoo  
dhaabaa sana keessa utuu adeemuu sagalee  
dhaga'an; isaan Waaqayyo gooftaa duraa  
mukkeetii iddoo dhaabaa sanaa gidduu in  
dhokatan. " Um 3: 8

Waaqayyoof namni dhaabbicha keessa  
nagaatti waliin deemaa turan. Cubbuun

booda garuu gargar bahan. Dhaabbaa  
Eden keessa jirtaa? Cubbuun injifannoo  
sirratti argatee jiraa? Kiristoositti  
amani,dhaabbaa siif jijjiiraa!!

"Ilmichi yoo birmaduu isin baase egaa isin  
warra birmaduu baatanii dha". "Yoh 8: 36



2 *Geetsemaanee-*

*Dhaabbaa dhiphinaati.*

Daandiin gammaachuuf

badhaadhinaa dhiphina

hadhaawaa booda dhufa. Nama jaallatanii

fi takkaa gargar bahanii hin beeknettii

gargar bahuun madaa sammuuti.

Akkuma ijoollonni dhibee dhiphina

addaan bahiinsa maatiin sammuuun

miidhaman maatiinis rakkoo ulfaataa  
daa'ima ofii irraa addaan bahuun  
dhiphatu.Waaqayyo Abbaa fi Yesuus  
gooftaan addaan bahiinsa kana fakkaatu  
Getsemaaneetti mulisan.

Yesuus ni dhiphate.Getsemaaneen Iddoo  
cuunfaa ejersaati.Ejersi cuunfame  
Qoricha,zayitaa,lbsaa fi kkf oola.Dhiphinni  
kiristoos hanga dhiiga dafqutti ture sun



Qoricha Fayyina keenya fiixaan  
baaseedha.Dibata gati jabeessa kanaanis  
nu dibee lubootaa fi mootota nu  
taasise:Ificha jireenya barabaraa of keessaa  
qabu nuuf tahe.Yesuus biyyi samii isa  
dabbarraan bashannana gara dachee  
dhufe osoo hin taane,dhiphinaan Lubbuu  
isaa kennun cubbamoota fayyisuu dhufe.

" Ilmi namaa hojjechiifachuudhaaf hin dhufne, namootaaf hojjechuu fi lubbuu isaa furii namoota baay'eetiif kennuuf dhufe malee" jedhe." Marq 10: 45

" Ilmi namaa isa bade barbaaduudhaaf fayyisuudhaafis dhufeera" jedhe." Luq 19:

10

Kiristoos qofaa isaa gatii cubbuu kaffale.  
Ulfaatinni cubbuu addunyaa maraa isa

buruqse dheekkamsi Waaqayyoos isa irratti  
boba'e, Qaama isaa mara keessaan dhiiga  
gati jabeessa arjoome!

" Amma garuu caaffanni raajotaa akka  
raawwatamaniif kun hundinuu ta'e" jedhe;  
yommuus bartoonni hundinuu isa dhiisanii  
in baqatan."

Maatewos 26: 56

Dhaabbaa dhiphinaa keessa jirtaa?

Dhiphina cubbuu, abaarsa,

dhukkuba,hiyyummaa fi kkf Kiristoos isa

waggaa 2000 dura siif raawwatetti dhiisii

dhaabbaa kana keessaa gara dhaabbaa itti

aanuutti bahi!



### *3. Golgootaa-Dhaabbaa*

#### *Moo'ichaa*

" Lafa inni itti fannifame

sana immoo iddoon

dhaabaa tokko ture; iddoo

dhaabaa sana keessas awwaalli haaraan,

kanaan dura namni keessatti hin

awwaalamin tokko ture. " Yoh19: 41

Dhaabbaa kana keessatti Kiristoos  
dhiphinarraa du'aan boqochuun  
Boqonnaa Amantootaa isa barabaraa  
ta'e. Dadhabbii fi dhiphina cubbuu irraa  
yeroo hundumaa kan itti boqotan Sanbata  
kakuu haaraa tahe.

" Yesus itti fufee, "Isin warri itti  
dhamaatanii dadhabdan, ba'aanis kan  
isinitti ulfaatu hundinuu gara koo kottaa;

ani boqonnaa isiniifan kenna." (Maatewos  
11: 28)

"Kanaafis waa'ee nyaataa fi dhugaatiitti,  
waa'ee guyyaa ayyaanaatti, waa'ee baatii  
lakkaa'uutti yookiis waa'ee Sanbata  
eeguutti, namni tokko illee isinitti hin  
faradin! Isaan kun gaadidduu wanta  
dhufuuf jiru sanaa duwwaa dha; wantichi

inni dhugaan garuu kan Kristos."Qol 2:16-

17

Dhaabbaa kana keessatti diinota jajjaboo

sadeen cubbuu,du'aa fi seexanni

weeraramuun mo'aman. Rom 8:2-

3,1br2:14,Qol2:15.

Yesuus cubbuu cubbamootaa tahuun du'ee

,Qajeelummaa Waaqayyoo Amantootaaf

tahuu du'aa ka'e.



" Yesus irra-daddarbaa keenyaaf du'atti  
dabarfamee kenname; qajeelummaa akka  
argannuufis du'aa kaafame." Rom 4: 25

" For he hath made him to be sin for us, who  
knew no sin; that we might be made the  
righteousness of God in him." 2 Corinthians  
5: 21

Kiristoos du'aa kakuu isaan du'a irratti  
injifannoo amantootaaf kenne.

" ammas immoo, "Mo'ichi kee meerree, yaa  
du'aa? Arfiin kees meerree yaa du'aa?"  
jedhamee caafame fiixaan ba'eera." 1

Qor15:55

Kiristoosiin beekuun moo'icha ofii  
beekuudha.

" Waan nu irra ga'e hundumaatti garuu,  
karaa isa nu jaallatee mo'icha guddaa  
arganna." Rom 8: 37

Ati dhaabbaa Moo'ichaa keessatti humna  
Waaqayyoon eegamtee jirta!



*4. Paradise-Dhaabbaa  
jannataa/jireenya  
barabaraa.*

Dhaabbaan Eden biyya

lafaa irra ture. Dhaabbaan paradise garuu  
samii keessa.

Kufaatiin Addaam jireenya Edenkeessaa  
ilmaan namaa baase. Dhufaatiin Kiristoos

garuu jireenya barabaraan samii nu  
badhaase.

"Yesus immoo, "Dhuguman sitti hima har'a  
anaa wajjin jannata keessatti in argamta"  
jedheen." (Luqaas 23: 43)

" "Namni gurra qabu, isa hafuurri  
qulqulluun waldoota kristiyaanaatiin jedhu  
haa dhaga'u! Isa mo'eef muka ija isaa  
nyaatanii jiraatan isa jannata Waaqayyoo

keessa jiruttii nyaachuu nan kennaa kan  
jedhuu dha." (Mul'ata Yohannis 2: 7)

" Ani buddeenicha jiraataa isa waaqa irraa  
gad bu'ee dha; eenyu illee buddeena"  
kanattii yoo nyaate bara baraan in jiraata;  
buddeenni ani biyya lafaatiif jireenya  
fiduudhaaf kennus, foon koo ti" isaaniin  
jedhe." (Yohannis 6: 51)

Samiin Amantoota 2ffaa dhalataniif:-

\*Biyya isaaniiti Filp 3:20

\*Iddoo dhalootaa Yoh 3:3-5

\*Iddoo maqaan isaan irratti caafamee  
jiruudha. Luq 10:20

\*Iddoo kiristoosii wajjin taa'aniidha. efe  
2:6

*Nuti Kiristaanonni kufaatii Edeniin kan*

*boonyu osoo hin taane, dhufaatii*

*Kiristoosiin kan boonnuudha.*

Adeemsi Kiristiyaanummaa lafa kanarra  
hamma jiraanutti jalqabbiin  
Kiristiyaanummaa gadi jedhanii Yesuus  
du'aa ka'eera jedhanii boolla duwwaa  
ilaaluun kan jalqabu; xumurri  
Kiristiyaanummaa immoo ol jedhanii  
Yesuus naa dhufa jedhanii eeggachuudha.



